

Gunāh kā Āghāz



gunāh kā āghāz

The Beginning of Sin

(Urdu—Roman script)

© 2022 Chashma Media.

published and printed by

Good Word Communication Services Pvt. Ltd.

New Delhi, INDIA

Bible text is from UGV.

illus.: <https://sweetpublishing.com> &

<https://www.fishnetbiblestories.com>


for enquiries or to request more copies:

askandanswer786@gmail.com



Burāi Kis Tarah Shurū Hūi?

Shurū meñ sab kuchh bahut achchhā thā. Hazrat Ādam aur Hawwā Bāgh-e-Adan meñ baste the. Allāh ne yih bāgh ḳhāskar insān ke lie lagāyā thā. Us ne Hazrat Ādam ko yih zimmedārī dī thī ki wuh is kī bāghbānī kare, use ṭhīk-ṭhāk rakhe. Hazrat Ādam ko jānwaroñ ko nām dene kī zimmedārī bhī dī gāi thī. Allāh ne in kāmoñ meñ insān ko pūrī āzādī dī thī kyonki us ne use is qābil banāyā thā. Sab se baḳkar yih ki insān ko bāgh meñ Allāh kī qurbat hāsil thī. Ḳhāliq ke sāth gahrā rishtā thā. Koī chīz bīch meñ hāil nahīn thī jo unheñ judā kar sake, jis se tālluq bigaḳ jāe. Is se behtar kyā ho saktā thā?



Ḳhudā ne Hazrat Ādam aur Hawwā ko sirf ek hukm diyā thā jise pūrā karnā āsān hī thā: Ek daraḳht kā phal nahīn khānā thā. Chūnki unheñ kisī

bhī chīz kī kamī nahīn thī is lie yih hukm mānanā āsān honā chāhie thā.


Ġharz Bāgh-e-Adan har lihāz se nihāyat umdā aur shāndār thā.

Ab āie ham Tauret sharīf meñ paṛheñ ki is azīm ibtidā ke bād kyā huā:

Gunāh kā Āghāz


Sānp zamīn par chalne-phirne wāle un tamām jānwaron se zyādā chālāk thā jin ko Rab Ḳhudā ne banāyā thā. Us ne aurat se pūchhā, “Kyā Allāh ne wāqāi kahā ki bāgh ke kisī bhī daraḳht kā phal na khānā?”

Aurat ne jawāb diyā, “Hargiz nahīn. Ham bāgh kā har phal khā sakte haiñ, sirf us daraḳht ke phal se gurez karnā hai jo bāgh ke bīch meñ hai. Allāh ne



kahā ki us kā phal na khāo balki use chhūnā bhī nahīn, warnā tum yaqīnan mar jāoge.”

Sānp ne aurat se kahā, “Tum hargiz na maroge, balki Allāh jāntā hai ki jab tum us kā phal khāoge to tumhārī ānkheñ khul jāengī aur tum Allāh kī mānind ho jāoge, tum jo bhī achchhā aur burā hai use jān loge.”




Aurat ne daraḳht par ḡhaur kiyā ki khāne ke lie achchhā aur dekhne meñ bhī dilkash hai. Sab se dilfareb bāt yih ki us se samajh hāsīl ho saktī

hai! Yih sochkar us ne us kā phal lekar use khāyā. Phir us ne apne shauhar ko bhī de diyā, kyonki wuh us ke sāth thā. Us ne bhī khā liyā.

Lekin khāte hī un kī ānkheñ khul gaīn aur un ko mālūm huā ki ham nange haiñ. Chunāñche unhoñ ne anjīr ke patte sīkar lungiyāñ banā liñ.





Shām ke waqt jab thanḍī hawā chalne lagī to unhoñ ne Rab Ḳhudā ko bāgh meñ chalte-phirte sunā. Wuh ḍar ke māre daraḳhton ke pīchhe chhip gae.

Rab Ḳhudā ne pukārkar kahā, “Ādam, tū kahāñ hai?”

Ādam ne jawāb diyā, “Maiñ ne tujhe bāgh meñ chalte hue sunā to ḍar gayā, kyonki maiñ nangā hūñ. Is lie maiñ chhip gayā.”

Us ne pūchhā, “Kis ne tujhe batāyā ki tū nangā hai? Kyā tū ne us daraḳht kā phal khāyā hai jise khāne se maiñ ne manā kiyā thā?”


Ādam ne kahā, “Jo aurat tū ne mere sāth rahne ke lie dī hai us ne mujhe phal diyā. Is lie maiñ ne khā liyā.”

Ab Rab Ḳhudā aurat se muḳhātib huā, “Tū ne yih kyon kiyā?”



Aurat ne jawāb diyā, “Sānp ne mujhe bahkāyā to main ne khāyā.”

Rab K̄hudā ne sānp se kahā, “Chūnki tū ne yih kiyā, is lie tū tamām maweshiyon aur jangalī jānwaron mein lānatī hai. Tū umr-bhar peṭ ke bal reṅgegā aur khāk chāṭegā. Main tere aur aurat ke darmiyān dushmanī paidā karūngā. Us kī aulād terī aulād kī dushman hogī. Wuh tere sar ko kuchal ḍālegī jabki tū us kī eṛī par kāṭegā.”



Sawāl

- *Sānīp ne Hazrat Hawwā se kahā, “Kyā Allāh ne wāqai kahā ki bāgh ke kisī bhī daraḡht kā phal na khānā?” Ab dhyān deñ, kyā Allāh ne yih kahā thā?*
 - ▶ Hargiz nahīñ. Yih jhūṡh thā. Lekin Hawwā ne us kī bāt māñ liyā jis kā sīdhā natījā yih nikalā ki us ne Ḳhudā kā hukm toṡkar gunāh kiyā.
- *Phir kyā huā?*
 - ▶ Phir Hazrat Ādam ne bhī yih hukm toṡkar gunāh kiyā.
- *Phir kyā huā?*
 - ▶ Yih karte hī unheñ mahsūs huā ki wuh nange haiñ. Unheñ sharm āi to wuh Ḳhudā se ḡdarkar chhip gae.
Yih kitnī afsosnāk bāt thī. Pahle wuh Allāh ke bilkul qarīb rahe the, aur unheñ us kī qurbat se ḡhushī mahsūs hotī thī. Lekin ab wuh us se dahshat khāne lage.

● *Kyā is meñ Allāh Ta'ālā kā koī hāth thā?*

- Hargiz nahīn. Sharm aur dahshat usī waqt paidā huī jab unhoñ ne ẖhudā kā hukm tor̄kar gunāh kiyā. Us waqt kuchh un ke aur ẖhudā ke darmiyān hāil huā, ek aisī chīz jis se wuh us se judā ho gae. Kitāb-e-muqaddas ise gunāh kahtī hai.

Yūhannā rasūl farmāte haiñ ki gunāh Allāh ke ahkām kī hukmadūlī hai,

Jo gunāh kartā hai wuh shariyat kī ẖhilāfwarzī kartā hai. Hāñ, gunāh shariyat kī ẖhilāfwarzī hī hai.

(1 Yūhannā 3:4)

Aur Yasāyāh Nabī farmāte haiñ,

Haqīqat meñ tumhāre bure kāmoñ ne tumheñ us se alag kar diyā, tumhāre gunāhoñ ne us kā chehrā tum se chhipāe rakhā, is lie wuh tumhārī nahīn suntā. (Yasāyāh 59:2)

Tab Hazrat Ādam aur Hawwā ne wuh kuchh kiyā jo ham bhī gunāh karte waqt aksar karte haiñ. Unhoñ ne apne gunāhoñ ko taslīm na kiyā. Na sirf yih balki unhoñ ne dūsroñ ko qusūr wār ṭhahrāyā. Ādam ne kahā ki Hawwā ne mujhe bahkāyā, aur Hawwā ne kahā ki sāñp ne mujhe bahkāyā.

Lekin Allāh in jaise bahāne qabūl nahīñ kartā. Har ek ḳhud hī zimmedār hai.



Phir Rab ẖhudā aurat se muḵhātib huā aur kahā, “Jab tū ummīd se hogī to main terī taklīf ko bahut baḥhāūngā. Jab tere bachche honge to tū shadīd



dard kā shikār hogī. Tū apne shauhar kī tamannā karegī lekin wuh tujh par hukūmat karegā.”

Ādam se us ne kahā, “Tū ne apnī bīwī kī bāt mānī aur us daraḳht kā phal khāyā jise khāne se main ne manā kiyā thā. Is lie tere sabab se zamīn par lānat hai. Us se ḳhurāk hāsil karne ke lie tujhe umr-bhar mehnat-mashaqqat karnī paḥegī. Tere lie wuh ḳhārdār paudhe aur



ūntḳaṭāre paidā karegī, hālānki tū us se apnī ḳhurāk bhī hāsil karegā. Pasīnā bahā bahākar tujhe roṭī kamāne ke lie bhāg-daur karnī paḥegī. Aur yih

silsilā maut tak jārī rahegā. Tū mehnat karte karte

dubārā zamīn meñ laut jāegā, kyoñki tū usī se liyā gayā hai. Tū ḳhāk hai aur dubārā ḳhāk meñ mil jāegā.”

Ādam ne apnī bīwī kā nām Hawwā yānī zindagī rakhā, kyoñki bād meñ wuh tamām zindoñ kī māñ ban gaī. Rab Ḳhudā ne Ādam aur us kī bīwī ke lie khāloñ se libās banākar unheñ pahnāyā.

Us ne kahā, “Insān hamārī māñind ho gayā hai, wuh achchhe aur bure kā ilm rakhtā hai. Ab aisā na ho ki wuh hāth baḥhākar zindagī baḳhshne wāle daraḳht ke phal se le aur us se khākar hameshā tak zindā rahe.” Is lie Rab Ḳhudā ne use Bāgh-e-Adan se nikālkar us zamīn kī khetibārī karne kī zimmedārī dī jis meñ se use liyā gayā thā. Insān ko ḳhārij karne ke bād us ne Bāgh-e-Adan ke mashriq meñ Karūbī farishte khare kie aur sāth sāth ek ātishī talwār rakhī jo idhar-udhar ghūmtī thī tāki us rāste kī hifāzat kare jo zindagī baḳhshne wāle daraḳht tak pahuñchātā thā.





Yih hai Tauret sharīf kā gunāh ke āghāz ke bāre meñ bayān.

Yon Hazrat Ādam aur Hawwā ko Bāgh-e-Adan ke khūbsūrat māhaul aur Allāh kī qurbat se nikalnā parā.

Gunāh kī wajah se duniyā pahle kī tarah achchhī na rahī.

Gunāh kā āghāz huā aur ham jo insān hain gunāh karne meñ lag gae.

Sawāl

- *Ham is bayān se Ḳhudā ke bāre meñ kyā sīkhte haiñ?*

▶ Ḳhudā pūre taur par rāst, sachchā aur muqaddas hai. Us meñ gunāh nahīñ hai, aur wuh gunāh se nafrat rakhtā hai. Is lie wuh lāzimī gunāh kī sazā detā hai.

Yoñ Yashua farmāte haiñ,

Wuh quddūs aur ḡhayūr Ḳhudā hai.
Wuh āp kī sarkashī aur gunāhoñ ko māf nahīñ karegā. (Yashua 24:19)

- *Allāh pahle hī farmā chukā thā ki kyā kuchh hogā agar Hazrat Ādam aur Hawwā us kā hukm toḡkar gunāh karen. Wuh kyā thā?*

▶ Us ne farmāyā thā ki wuh mar jāeñge. Kyonki maut gunāh kā natijā hai. Yoñ Paulus rasūl farmāte haiñ,

Gunāh kā ajr maut hai.
(Romiyon 6:23)

Har ek apne hī gunāhoñ ke lie zimmedār ṡahrtā hai.

Yon Tauret men likhā hai,

Wālidain ko un ke bachchoñ ke jarāym ke sabab se sazāe-maut na dī jāe, na bachchoñ ko un ke wālidain ke jarāym ke sabab se. Agar kisī ko sazāe-maut denī ho to us gunāh ke sabab se jo us ne khud kiyā hai. (Istisnā 24:16)

Azrā Nabī bhī jānte haiñ ki ham sab gunāhgār haiñ aur is lie Allāh ke sāmne qāym nahīn rah sakte. Wuh farmāte haiñ,

Tū hī ādil hai. [...] Ham qusūrwar haiñ aur tere sāmne qāym nahīn rah sakte. (Azrā 9:15)



- *Kyā Allāh ne Hazrat Ādam aur Hawwā ko fauran sazāe-maut dī?*

► Nahīn.

- *Kyon nahīn?*

► Kyonki use un par tars āyā. Us ne un kā nangāpan ḍhānpne ke lie khāloñ se kapre banākar unheñ pahnāyā. Jānwaroñ ko marnā paṛā tāki un kī sharm ko ḍhānpā jāe. Go Hazrat Ādam aur Hawwā khud apne gunāhoñ ke zimmedār the to bhī un kī sharm ko bequsūr jānwaroñ se ḍhānpā gayā. Yoñ pahlī bār insān kī khātir khūn bahāyā gayā. Allāh ne Hazrat Ādam aur Hawwā ko ekdam sazāe-maut na dī, lekin un kī zindagī ke sāl mahdūd ho gae. Sāth sāth zindagī dushwār ho gāi. Hazrat Ādam aur bād ke mardoñ ko pasīnā bahā bahākar kāshtkāri karnī paṛī. Roz kī roṭī kamāne ke lie baṛī mehnat-mashaqqat karnī paṛī. Hazrat Hawwā aur bād kī auratoñ ko bachche janm dete waqt bahut taklīf jhelnī paṛī. Pahle sab kuchh kitnā achchhā thā, aur ab sab kuchh kitnā mushkil aur dukh bhārā ho gayā thā.

- *Go Allāh ab bhī unse muhabbat rakhtā thā to bhī us ne unheñ Firdaus se nikāl diyā. Yih zarūrī thā. Kyon?*

► Tāki wuh zindagī ke daraḡht kā phal khākar abad tak zindā na raheñ. Warnā unheñ abad tak gunāh kī hālat meñ rahnā paṛtā. Isī lie Ḳhudā ne unheñ Bāgh-e-Adan se nikāl diyā tāki wuh us meñ ghus na sakeñ.

Ab se Hazrat Ādam aur Hawwā Allāh kī qurbat meñ nahīñ the. Ab se wuh barāh-e-rāst us se bāt nahīñ kar sakte the. Ab se wuh Bāgh-e-Adan ke ḡhushgawār māhaul meñ nahīñ rahte the.

Sab se afsosnāk bāt yih thī ki gunāh se wuh Allāh se judā ho gae. Natije meñ na sirf wuh balki tamām insān Allāh se alag ho gae haiñ.

Ḳhudā ke sāth un kā gahrā rishtā ṭuṭ gayā thā. Us waqt se insān Allāh se judā rahtā hai. Gunāh aur sharm hamārī wirāsat meñ hai, aur ham yih hālat badal nahīn sakte. Jis tarah hameñ apne mān-bāp se bahut-sī chīzeñ wirāsat meñ miltī haiñ usī tarah ham is sharm ko bhī wirāsat meñ pāte haiñ jo hameñ Allāh se alag kar detī hai.

Yoñ Paulus rasūl farmāte haiñ,

Jab Ādam ne gunāh kiyā to us ek hī shaḳhs se gunāh duniyā meñ āyā. Is gunāh ke sāth sāth maut bhī ākar sab ādmiyoñ meñ phail gaī, kyoñki sab ne gunāh kiyā. (Romiyōñ 5:12)

Hazrat Dāūd Bādshāh bhī farmāte haiñ,

Yaqīnan maiñ gunāhālūdā hālat meñ paidā huā. Jyoñ hī maiñ mān ke peṭ meñ wujūd meñ āyā to gunāhgār thā. (Zabūr 51:5)

Ham mein se koī nahīn hai jo apne gunāhon ko chhipā sake. Ḳhudā sab kuchh jāntā hai. Yon Zabūr mein likhā hai,

Ai Allāh, [...] merā qusūr tujhse poshidā nahīn hai. (Zabūr 69:5)

- *Kyā Ḳhudā se yih rishtā kabhī bahāl kiyā jā saktā thā? Kyā koī tariqā hai jis se ham jo kamzor aur gunāhgār haiñ Allāh kī qurbat hāsil kar sakte haiñ?*
 - ▶ Agar ham kāmīl aur bilkul begunāh zindagī na guzāreñ ham Allāh ke huzūr nahīn ā sakte. Aur yih to nāmumkin hai. Phir bhī himmat hārne kī zarūrat nahīn hai. Beshak ham kuchh nahīn kar sakte, lekin Ḳhud Allāh ne ek mansūbā banāyā jis se har insān kā us ke sāth rishtā bahāl ho saktā hai.

Jo Tauret mein tafsīl se gunāh ke āghāz ke bāre mein paṛhnā chāhe, wuh paidāish 3 mein yih paṛhe.